

IULIUS CAESAR.

Diuo Iulio Cæsari, hoc in primis etiam ab hostibus datum scio, vt memoria polleret eximia, de qua M. Tullius ait: quod nihil soleret præter iniurias obliuisci: & legere simul, & scribere, & audire, & dictare solitus traditur: Epistolas de rebus maximis, quaternas dictabat aliis, ipse manu propria quintam scribens, ac si calamum eximeres, septenas pariter dictabat: quæ quidem velocitas, an volubilitas promptissimi ingenij, an amplissimæ firmitas memoriæ dici mereretur, incertus sum. Siquidem celeritas ingenij, tenacitas memoriæ laus est: Quodlibet ei nomen impuleris, magna res in primis & mirifica, tam facilè singulis adesse, tam fideliter omnium meminisse.

Q. F. MAXIMVS.

Nec sum nescius huius quoque rei singularem Q. F. Maximo laudem contigisse, inter multa nimirum, quæ ipsius viri gloriam extollunt, hoc non in ultimis potuerim, quod ingenti quadam fuit notitia vetustatis ac memoria, de qua est apud Ciceronem, quod omnia non domestica solum, sed etiam externa bella

e. j.